


T3072.8/3166 (P)



CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

DEC 9 1953

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

DEC 9 1953

臺灣外記卷之十八

授南邦之信遇敵



破清漳吳淑獻城



康熙十四年乙卯

附稱永曆二十九年

正月原任福建總督范承謨被

耿精忠禁于幽室罵賊不去口絕粒已十餘日守者勸曰公

達書明理不見宋丞相文天祥乎徒作小丈夫餓死泯泯無

聞何益不如延以待時作郭汾陽李光弼公以言為頗是強

進水漿茲逢元旦身帶械索欲尋死而守者防護遂望北九

叩曰臣負罪深矣不即死者正欲圖報將來耳起尋無片紙

用炭畫壁上 詩曰

哈佛大學漢和圖書館珍藏印

遙瞻北闕申華祝

時撫南薰憶舜琴

弱骨倩人扶拜舞

不禁揮淚五雲深

鄭經率文武拜賀于泉之承天寺稱永曆二十九年耿精忠稱乙卯年用福州人項四爲總鹽商按月按家給鹽如不領者卽以良私論罪又以戶曹主事林亦善兼管錢法司鑄裕民錢有一文一分一文一錢者一文一兩者數兩者且有十兩者以充兵用不遵用者斬亦善執法媚權啓其姪捷使抗違立斬示衆精忠見鄭經現據漳泉潮三府兵馬強盛而王進又屢敗故汲汲求好遣吏曹張文韜抵泉與經賀年竝送大戰船五隻以踐前約舟師之助議和經許之遣禮官鄭斌刑官柯平入福州答禮精忠令禮曹金鏡林日光接待二使

次早斌平欲進謁精忠鏡與日光問二使曰今日入見我主欲行何禮平日非天子不議禮鏡與日光無復難之斌平入行客見禮與精忠約從楓亭爲界限有事相援無得侵伐議遂定平斌回復從此鄭耿交好安達公尙之信奉可喜令提兵至大埔縣用千總朱樑爲鄉導從扶膠白濠松過平和縣進援偵探飛報進忠忠知之信從間道兼程將到隨遣曹應鵠同施鳳林陞鄭國選王一新林天桂蔡大茂興何祐統領進據百子樓截粵東援師進忠督江勝諸鎮日夜攻打夢吉文科率衆百計禦之死傷過半而城不下尙之信大隊繞道已到饒平近境偵報百子樓賊兵列營之信知其有備亦屯

劄著騎兵四探何祐聞粵師到令王一新出哨相遇于百子樓之東交戰未分勝負各斂兵回祐發令曰兵貴神速乘其初到土地未熟民情未浹攻之必遁若縱其結營深溝固壘則難搖動矣明日施鳳蔡大茂爾二人帶本部將士埋伏于百子橋左王一新林天桂爾二人帶本部將士埋伏于百子橋右國選爾前引戰詐敗俟騎兵齊至方出合擊諸將領命而去祐與林陞曹應鵠等列陣以待次早之信以步兵火攻爲先鋒騎兵分爲左右翼進攻百子橋營壘國選接戰之信令火攻齊發國選難當退下之信見國選敗揮騎兵合左右齊冲祐奔出陣陞舞牌佐之祐連砍數騎騎兵稍怯而王一新

新從左喊殺出施鳳從右喊殺出之信勢虛遂潰死騎兵二千餘人不敢結營星夜遁大埔縣祐追三十餘里方鳴金收軍後探知之信回大埔亦班師經合進忠攻城沈瑞見援兵不到糧餉已匱殺馬掘鼠以食後聞之信敗遁計窮仍與夢吉文科商議投降遂遣人詣進忠軍中請降忠許之代請于經經以其降而復叛降一等表封沈瑞爲懷安侯徙其家于廈門安插二月鄭經毀經畧洪承疇祠祀銅陵黃道周江門蔡道憲于內又竄承疇姪士昌士恩暨故明癸未翰林泉州晉江縣人楊明琅二眷口共百餘人于鷄籠淡水其責明琅曰爾身爲詞林當甲申煤山之變旣不能死難反敢於賊隊

中揚揚得意策馬過梓宮而復睨視之句後明琅亦死于竄
所永春知縣鄭時英遣人入馬跳寨說呂華許以不死華亦
以人衆乏食不得已降英代之請經不允礫華一人籍沒其
家餘者令英厚恤之四月劉進忠以平南兵屯普寧實有窺
探意我師雲集潮州日費數千金以老其師不如進取以廣
其地啓請經許之授進忠爲正總督國軒副之何祐江勝爲
先鋒督諸鎮進屯新墟與王國棟營壘相對經又以吏官洪
磊爲潮州宣慰使李景督理潮州鹽務徵計軍前糧食五月
經自泉州回廈門旋又入居海澄黃芳度雖奉鄭經約束實
出于勢之無奈每登城北望嘆曰孤軍力短何日得伸己懷

而傲桓彝也卽遣黃藍齋密本從間道入京竝書與兄芳世
囑其速爲啓 奏請師出援又差人密持書仙霞關與黃

登令其撤師回漳白衛翌接書不請命于精忠將所部兵從
建寧寧洋山道回漳芳度忽聞經回廈門又驟入海澄居住
心不自安密整軍旅繕收城池遣其中軍朱武齋啓海澄接
經叅請謁見以覘虛實經厚賞武而允芳度入見武回報度
益不自安延月餘未敢進謁經遣協理禮官鄭斌入漳同知
府葉亨慰撫之云旣不肯謁須出兵從征度禮待斌許卽帶
兵南行而終不遵其令又慮經統師圍城與吳淑計議欲率
親信護眷口從小溪平和間遁粵東度日出遁粵東脫離

虎口其策甚高但恐兵心利輜重中途不測悔之無及不如
速差人往平藩處請援倘有緊急據城堅守以待救援芳度
是之遣兄芳泰從平和越大埔抵粵東見尙可喜借兵可喜
卽令安達公之信整兵往救竝令之孝王國棟進兵潮州以
分其勢劉進忠等列營新墟見之信國棟深溝寨柵設險固
守而騎兵精銳未敢進擊相持日久可喜以芳度之請再益
騎步兵一萬與王國棟令其攻潮以分賊勢庶漳州可援進
忠偵國棟進兵恐其逼戰與國軒謀曰國棟添兵不日必來
吾營但此處平坦非險要之地不可與戰且退守潮州以避
其鋒國軒曰避之誠是若退潮州必不可也進忠曰退而後

戰不但保城而且可以束兵國軒曰公知其一不知其二也
凡事當審時度勢今與昔不同昔日之圍可救今日若圍必
不可援也進忠曰願聞其說國軒曰去歲之援我師平耿回
戰而軍心雄壯廣兵圍久師老故望風披靡今日廣兵大隊
而來必有成算兼之邇來漳州勢欲投誠廣師一到漳州必
憊漳州若應福州亦背盟南下四方鼎沸若再圍困則不可
援也且暫退鳳塘寨之左鰲母山列營以待與之決戰進忠
曰公籌之詳拜服遂約是夜退軍次早哨探報國棟曰海賊
昨夜已退國棟曰烏合艸寇必有漳州之信故退宜速追之
卽率騎步尾後齊進屯劄新墟發令曰海寇怯戰而退明日

當奮勇破之不可畏縮使彼深溝固守以作潮州犄角國軒
謂進忠曰王國棟提兵追趕如此之速必有所恃明日當嚴
陣以敵出奇兵破之進忠曰然以何祐江勝爲先鋒林應林
陞爲左右伏兵令三更造飯四更飽食五更在伍進忠國軒
率曹應鵠李雲鄭國選施鳳王世澤王一新劉成良洪經邦
劉成業洪羽周鵬雲林天桂曾成蔡大茂朱纘等作長蛇勢
迎敵國棟以進忠退兵之速疑爲漳州信急兼恃兵將衆多
以騎卒爲先鋒步旅與鄉勇爲左右援遍野滿山齊進豈期
騎兵未到左援步旅從間道山頂先出與氏宿鎮萬燾陣相
遇火器齊發燾少怯退下我師迫之燾又退又逼之燾遂退

山下何祐望見燾敗令火攻營萬坡領衆往援軍甫出營而
進忠業發號令炮三聲衆軍齊冲伏兵亦起喊殺轟天左右
步旅與鄉勇俱星奔騎兵遂無鬪志亦遁進忠兵追至二十
餘里方鳴金收軍國棟風聲鶴唳直追至普寧縣方收軍安
營是役也道宗萬和尚于戰場收屍骸計三千有餘瘞義塚
者五尚有不能遍及者進忠國軒報捷仍進屯新墟六月黃
芳度以兄泰入粵請援一旦被圍外無接應又遣後鎮賴陞
帶兵出守平和小溪一帶地方並嚴謹城門出入虞有細作
知府葉亨村芳度有異志偕出城拜訪遁回海澄度遂薙髮
據城經接亨面啓繼報芳度薙髮據城笑曰此賊自作之孽

死期近矣我師有名也迨進忠國軒鬻母山之捷決意進勦
率侍衛馮錫范左武衛薛進思右虎衛許耀左先鋒鎮張學
堯前冲鎮洪羽戎旗三鎮林定戎旗四鎮董侃宣毅後鎮黃
雲井宿鎮江仰聖援剿中鎮蔡文金武鎮陳侃中提督中鎮
李印過石尾從萬松關而進合興明伯左提督趙得勝督其
中鎮馬騰龍左鎮陳昌右鎮陳大烈奇兵鎮黃韜援剿後鎮
萬宏土武鎮黃良驥正兵鎮陳梓等從石碼古縣而進又令
安東將軍劉炎督其左鎮徐德澤右鎮陳子龍揚威後鎮陳
福木武鎮馮友魁信武鎮張國傑英兵鎮劉成良牛宿鎮曾
偉火武鎮施延等從馬口木絲而進俱會師於漳城芳度探

知鄭經各處調兵虞爲所困卽令呂孝德星馳粵東求救經
見諸師齊到合圍攻擊芳度吳淑督兵守禦經以小溪平和
一路尙係賴陞把守應接粵師者馳諭潮州令何祐統施鳳
鄭國選林陞林應等由饒平攻賴陞祐得令兼程兵進賴陞
聞祐率兵屯百松關設伏守禦祐知陞備禦于關未敢突
進令鄭國選施鳳偷小路繞陞之後合攻陞見祐師不前村
祐地理諳熟必有別謀遂退守平和祐見陞退率軍尾追進
圍陞以城低兵寡又無援師不敢守是夜開北門走據割竹
寨祐次早入城安民令鄭國選鎮守分一軍與林陞施鳳守
小溪以通漳州自領大隊圍割竹寨伏險要將至五十餘日

陞糧盡乞降祐許之代爲啓經經授陞爲後衝鎮仍令祐回
潮州鄭經屯劄楊君嶺令馮錫范率衆屯東嶽廟督攻東門
趙得勝攻北門劉炎攻南門許耀攻西門掘壕開塹築垣列
柵以爲久計芳度以吳淑吳潛戴麟陳士凱守東門吳文陳
驥許毅吳智守西門朱武洪方名陳獻蔡隆守南門黃翌史
良臣許元吳友守北門芳度置火藥數十桶密環府內苟有
不測可以自焚免致遭辱又屯一營于開元山頂甲不離身
日夜巡督經令于高埠安冲天炮打入淑傳令見炮從天落
者避之經以天炮不濟令架龍嶺攻之發三炮城垣崩百餘
丈芳度與淑督兵民負土填石立崩立築以禦經令四面環

攻雲梯齊倚度見勢危迫懸重賞以鼓勵士卒士卒各殫力
用火箭矢石藥桶斧鑿擊燒其緣城者擊死援剿後鎮萬宏
竝兵將填滿溝壕乃退度以援師不到爲憂陳驥吳智向前
曰驥等受兩世恩養於無寸功以報今當此大難敢惜其身
與其受困坐斃不如臨敵雖戰死沙場亦大丈夫也願與智
領一旅密啓西門冲殺芳度壯之驥智二將挑選五百健勇
銜枚而出智謂驥曰前面營盤是許耀的當先攻之以挫其
銳驥與智奮勇齊劫耀營耀忙出敵死者不計數幾大北矣
忽洪羽秦文二將率衆救至驥智不敢貪敵遂收兵入城無
失一人芳度大賞陳驥吳智二將勒督諸軍甘苦與共日夜

臺海夕言 卷一八
提防七月鄭經見屢攻不下且損折兵將甚多而計亦拙又發令諸軍四面再協力齊攻有能先登城者以德化公爵賞之炮聲不絕薙堞崩壞芳度吳淑白計禦之忽報吳智爲炮傷甚重芳度親詣其家令醫調治不數日死芳度大爲悲慟八月淑弟吳潛見城自六月被圍粵援絕無影嚮遂與中營陳士凱謀曰此城雖堅固奈被圍日久恐全省悉復明而大埔山道崎嶇苟有一旅據其險要援師亦難飛至士凱曰依公所言不如獻城潛曰吾亦有心久矣但未知吾兄意如何凱曰汝試往探之潛曰然是夜潛督衆巡城至東門見淑按劍踞胡牀潛以言挑之曰城圍日久廣東援師不至軍心惶

惶然虞有異謀淑厲色喝曰誰敢如是汝勿妄言潛遂退復士凱曰吾兄志壯事未可行凱曰且識于心見機而動黃芳世已授爲福建中路總兵同將軍尼雅漢奉

旨至廣東欲會平南王尚可喜合兵恢復正逢黃芳泰在粵請援救漳可喜令之信治師九月芳度恐援師遲至糧餉不繼徵派鄉紳富民助餉城內惶惶馬辰到廣芳泰芳世急詢之方知漳城于六月被圍望救甚切芳世請命可喜喜令之信兼程而行十月芳度出黃金竝環珥作是月兵餉諸軍不知以爲餉盡各竊竊偶語潛見兵心欲貳乃乘機說淑曰援師如此遲緩月餉已發金與環珥是內帑已匱軍心將變兄

不可守婦人之仁以禍身淑不應嘆氣轉身而入潛會意是夜卽遣人縋下往東嶽見錫范約獻城范啓經經大喜授淑平鹵將軍後提督潛爲戎旗二鎮陳士凱爲木武鎮印劄旗幟並金龍黃纛悉藏入城潛將所謀告淑淑駭然潛曰事已成矣約在明晨淑不得已從之初六早潛于東門城上發空炮三聲開門迎降錫范揮軍分兩隊入緣城而行又一隊從大街進圍芳度衙署度忽聞東門炮連嚮以爲賊將臨城卽披掛上馬從北門登開元山望之見東南城上悉係經旗號環旋而行知城已破遂跳馬下山欲回府自焚方至開元街頭突見前面賊旗出不敢前仍轉轡奔入開元寺內呼左右

曰爾輩當殺吾首級以獻左右悉淚下芳度曰旣不殺我亦當各自爲計左右四潰芳度下馬投開元井上橫身倒首栽下

按芳度至丁巳恢復追贈王爵謚忠勇立祠世襲十二代

鄭經入城安民出令有藏黃氏一人者滅族尋芳度屍于開元井收其二弟眷屬於其將黃翌黃芳名朱武蔡隆陳驥陳猷戴蟒張濟等羈海澄縣出黃梧屍于棺與芳度屍磔于市報發塚也初十日馳令至海澄斬其二弟暨朱武蔡隆黃芳名黃翌陳驥陳猷戴蟒張濟等示衆拋其各屍于海有請經

發黃梧諸祖塋者經不許曰罪止其身與死者何預尋而勒令芳度妻李氏等自縊發其親族渡海淡水充軍陳繩武曰今者福州業已連和漳州既平宜移鎮于此從中調度經從之移鑾倖于黃梧書室居焉黃芳世同尼雅漢尙之信提師至大埔縣偵平和業有重兵况山道崎險車馬難行隨轉從永定大路進次永定兵民閉門不納之信遣人招之不從婉言招之又不得之信大怒發令攻城芳泰曰公言差矣豈有提師向前而容賊兵從中隔絕乎此城不順譬如咽喉生物耳當督兵急攻之即分軍屯營山頂作疑兵初四日下午架炮攻破其旁寨初五日發各隊備雲梯以候次早環攻初六

日之信揮軍以木牌遮矢石賈勇登城城遂破出示安民初八日進兵芳世芳泰由苦竹星夜抵梅壟張窖忽偵者至報漳州于此初六日吳淑兄弟獻城公爺闔門死難芳世芳泰聞之擗踊呼天曰是吾二人之罪也遂停師次日之信到芳世芳泰哭陳其事信慰之曰如此前進無益且暫回師世與泰不得已從之信歸因恨永定之阻任兵擄掠婦女空其城回粵東之程鄉縣

按世泰二人回粵依可喜迨之信剪辮降吳三桂與鄭氏和懼鄭氏相索走依馬雄雄以廣寧縣與之駐劄丁巳四月間 大師至芳世逸出江西投 和碩康親王

鄭經允陳繩武之請以漳州居中便於調度遂駐劄令趙得勝仍回海澄縣遣林陞林應劉炎洪羽許貴黃韜蔡文王德鄭國選施鳳吳潛吳友張國傑馮有魁陳大烈劉成良曾偉馬騰龍王一新諸鎮次第下潮州隸劉進忠劉國軒二人統轄征南尙可喜接之信飛報知漳州已破芳度死難咨嗟嘆息卽代爲始末詳陳 題報於馳令芳世芳泰帶所部兵回粵東仍檄之信督苗之秀等師從程鄉縣而進之孝督王國棟嚴自明等從普寧分道而進合攻潮州又痛漳州救遲致芳度闔門遭禍悉係劉進忠反潮從中間隔之故今雖依負海上未知其爲人始末卽修書遣使至漳見經其書曰

不穀聞之擇地而處者立身之經擇人而與者友儕之義去歲春夏間八閩倡亂將軍率臺灣之衆來據閩土說者謂將軍與耿逆爭權不意其來我潮援劉進忠也進忠爲詔安參將屢以斬將軍士卒之功授爲潮州專闢不思堅守卽節乃敢附從耿逆攫城據守及遣兵擒剿進忠向不穀請撫遂蒙

朝廷恩宥又竊將軍威福三姓家奴反覆變幻異日捏將軍之虛實竊將軍之首領又向他處倖功皆其必有之事何將軍不察而自殘士卒以救仇敵以長肘腋之患耶至耿逆乳臭之子輕率妄躐三世受

國厚恩一旦反顏倡亂不忠不孝之尤者初以將軍爲附庸賢喬梓素抱忠義之名節奈何忍而受之若謂目前之逆正在雲擾不妨乘機煽亂其計尤左自古殷憂啓聖歷朝三四十年的內必有變亂征討之事今禁旅四出捷音頻聞將軍豈不知乎苟英雄豪傑識時知命於此爲一猛省建非常之勲收不次之爵光及先祖榮被子孫詎不偉哉乃將軍計不出此竊爲將軍惜之伏思順治年間賞爵厚封令先君旣納降而順受後以要請不諧遂致棲身無地是令先君之負氣寡謀也倘一念轉移卽與不穀會合將軍自泉州進發不穀從汀州夾攻則耿逆腹背受敵必不

能支八閩之地可指顧而定果有此成議

朝廷必深嘉之不穀當極力保

奏閩粵鄰封分茅列土

永爲二姓之歡計無善于此者矣若執迷不悟必欲爭衡主客之勢強弱之形昭昭在人耳目豈有倖耶令先君在日亦嘗破揭陽澄海普寧三縣毫未得利而回况昔日之精兵宿將今爲我

朝公侯其餘烏合萃聚未見大敵者安能濟事將軍年少或未深知其左右舊人可以詢問正知不穀非謾語耳玆因壁壘相對不忍擯絕故屢屢陳之如此統祈鑑照惟望德音

經得書笑謂錫范繩武曰老邁昏聩不知死期之將至賞其使而復以書曰

明朝有中興之助天意當一變之期亦識時應世者之所深知也將軍昔與吳潘密約反正諸郎君兵將皆有叛志乃衰敗昏眩觀望不佞正鄙笑之頃者書來竊喜悔心之萌必有成說及發翰大謬不然夫將軍固明朝毛帥之役卒也常受國恩下喬入幽甘飲太牢斯亦前事無足責者幸未就木值天道往復正羣雄義舉之日假令棄邪歸正並力王事猶可盡洗前愆生超醜類之名死無背負之惡尤未朱計也乃昏耄迷惑惟不知返反責耿劉爲叛逆如

將軍之背明者爲非叛逆耶我家世篤忠貞持正朔于不墜事濟之日萬代信史難逃董狐之筆分茅列土我自白有之無煩將軍過計也若邀天之靈我師水陸直搗羊城主將不識避忌取將軍首級懸之橐街天下聞之誰不欣然將軍至老尙未識忠叛順逆之名義亦何足論主客強弱之形勢卽所云烏合萃聚未見大敵前者黃岡之役蠶母山之師將軍自稱饒勁一鼓而敗衄幾盡恨此少敵不能怯耳來書驕慢本不裁答冀有平旦自愛身家故敢矢告以俟後悔幸見原諒

十二月鄭經屢檄催進忠國軒進兵進忠于二十八日督諸

鎮出攻王國棟于普寧縣時尙可喜年邁兼病目暗瞶人事
彷彿又報吳三桂遣將軍楊雄郭義等寇廣西廣西將軍孫
延齡業已剪辮投降不日即分旅從梧州出擊肇慶高雷廉
迫新會因是王國棟與嚴自明將兵各無戰志遂連夜退守
葵潭海豐國軒謂忠曰兵貴神速速攻之國棟必走也

卷十八終

臺灣外記卷之十九

平福省范公死節

戰龍江許耀逃竄

康熙十五年丙辰

附稱永曆三十季

正月朔清晨原福建總督范承

謨被耿精忠禁于幽室身帶械索望北九叩起又將炭燼畫
于壁上題曰

春回兩鬢復霜侵

愁病翩翩次第尋

餐雪三年如一日

傾葵百兩結同心

遙依北斗同陽鴈

何日南熏待舜琴

拜舞但能長叩首

模糊淚眼白雲深

初三日劉進忠合國軒何祐江勝等軍逼戰國棟果不敢敵

惟有退師而已於是進忠軍威大振鄭經得進忠兩次捷報
又令邱輝楊彥敵洪邦柱李虎等水師大小船五十餘號揚
帆從碣石衛合攻碣石總兵苗之秀奉之信令提師駐劄程
鄉縣其守碣石將見之信屢敗又舳艫遍海隨脅其夫人鄭
氏降夫人無奈詣進忠軍前納款進忠允許令夫人馳書與
之秀秀接書舉衆剪辮降忠請于經經授之秀爲滅鹵將軍
程鄉一路盡爲鄭有進忠旣得碣石分一旅以吳六奇之三
子振義鎮吳啓鎮六奇之六子奮義鎮吳啓宮爲前導引洪
羽等從通判府由蛇坑而出合苗之秀師攻興寧長樂等縣
會于惠州府又令何祐督一旅從惠來縣而進進忠與國軒

整大隊至海豐國棟聞忠帥將至不敢與敵遂焚營盤與嚴
自明退守羊蹄嶺甫豎柵結寨飛報海賊船隻由靖海甲子
洲登岸欲從平山出抄其後國棟即棄羊蹄嶺柵寨與自明
星夜遁入惠州府進忠偵知兼程尾追列營將城圍困差人
說之國棟賞其差者出各分城守禦自明守惠州府國棟守
歸善縣列柵安炮於水當街兩邊提防玲瓏相通忠與國軒
亦分諸鎮開壕築炮臺日夜攻擊但惠州府二面環流一面
是湖惟西南角是路其歸善縣三面是水一面是山其城環
在山上故難攻打水路况可通廣省糧餉火藥不時接濟進
忠謂軒曰今惠州雖圍而水道尙可通須當進攻博羅縣若

博羅一得斷其水路惠州自危也公督諸鎮困二城俟弟提
一旅渡河攻之軒以爲是正欲分師值洪羽苗之秀等由平
和連平州龍州河源至惠進忠令羽同行迨至博羅覘其城
半枕山半環溪遂取河州屯衆上下以扼往來接應築炮臺
攻打令軍士齊倚雲梯親隨一營黃經邦與火攻營曾大用
二將領先鋒奮勇奪先鼓衆而上被城上矢石藥桶打下經
邦大用俱爲石壓死將士填滿壕溝乃退吳三桂遣將軍馬
雄郭義率衆寇廣西總督金光祖從梧州夜遁報失印尙可
喜老病不能主事將兵馬軍務交子安獻公之信信嚴整軍
旅修葺城池二月報馬雄統衆逼新會信遣趙天元謝厥扶

率衆禦之元扶陰納欵屯三水縣而邱輝楊彥敵洪邦柱李
虎等舟師逼靖海進忠以博羅未下隨馳令邱輝以所轄水
師由虎頭門而進以作聲援邱輝卽督諸船至虎門守東莞
總兵張國勳遣人至博羅軍前見精忠投降忠大悅令江勝
督李雲鄭國選劉成良等衆屯石濃其新安龍門諸縣望風
悉降進忠飛報鄭經經授張國勳爲征鹵將軍檄進忠速攻
惠州撲滅此賊庶可水陸並進合擊粵東尙之信見吳鄭兩
處之兵合至而郡縣兵將咸瓦解去欲分兵出禦兵寡力
單隨遣官往三水見馬雄郭義願剪辮歸降雄義允其請按
兵三水差人齎之信印冊降書往湖廣見三桂三月桂馳封

之信輔德公又勸其與鄭經連和竝諭馬雄郭義爲兩家排
解分界各守邊疆無事征伐會師齊出江右之信旣剪辦降
周遂遵三桂之勸令人至惠州檄王國棟嚴自明撤師回省
退讓惠州歸善博羅二縣與進忠仍遣使通好竝餽送馬匹
弓矢幣帛馬雄將軍亦奉三桂令隨差官知會尙之信同到
博羅軍前見進忠國軒傳述三桂以東莞新安石濃爲界退
讓惠州歸善博羅二縣進忠國軒從其議卽撤圍國棟與自
明刻將兵馬回廣省進忠國軒入城安民秋毫無犯飛捷報
鄭經經又接馬雄諸將軍公啓暨勇威將軍秦彝伯郭義私
啓有曰

銅山當日鷓首業已向東一時忽被所脅而入實非己意
告罪圖報將來云云

經答以手札有曰

銅山之變實非將軍之意本藩業已稔知其詳覽啓知忠
義之氣凜凜故主之恩戀戀當努力馳驅克奏大功其所
以報効周王者卽所以報効本藩也勉旃勉旃

經卽以鄭珍英爲惠州府鹽政使以南靖知縣羅士倫爲惠
州知府江美鼇爲連平知州改海陽知縣童士超爲東莞知
縣以林良瑞爲海陽知縣張芳勝爲龍州知縣餘悉原職令
國軒守惠州劉進忠同何祐江勝林陞林應洪羽王一新劉

成良洪有魁曾偉鄭國選施鳳陳大烈等回潮州候與吳三桂會師出江西以許贊爲泉州二府學道以潮州知府王仕雲爲惠潮二府學道且褒仕雲有江南宿學嶺表名臣之句差禮官都事林貴齎書並幣帛倭刀鹿銃入廣東答輔德公尙之信禮知會出師日期又修書有曰

六師將帥奮力爭先固已早褫醜魄矣今旣翻然悔悟共伸大義百粵悉入版圖兵貴神速未可坐老惟祈殿下統滇黔秦楚勁旅不佞率舳艫入瓜鎮遣諸將出豫章共清中原同拜孝陵俾史冊垂馨河山永誓云云

遣甘督陳文煥往湖廣見三桂約會師耿精忠接吳三桂報

百粵已平疆界連通速當合師江南之約卽令總兵蔡達帶其本部兵士往汀州協守代懷遠將軍五軍都督馬應麟督師出兵攻瑞金與將軍朱飛熊楊明等合取贛州叅囑相機圖應麟見達到遂請入城厚待達暨其所部諸將應麟思精忠不以蔡達勁旅從征而以達代守必有圖己之意密布設伏防範周至方率衆出寇瑞金又令總管周應時從間道往漳州通鄭經欲獻汀州經得應麟啓與馮錫范陳繩武商議武曰招降納叛今正其時豈有與而不取者乎經曰業與耿藩和好取之誠恐爲天下笑武曰天下乃天下之天下豈耿藩之所自有惟有德者居之令耿藩失望應麟擇主而事

安可棄之以失天下英雄向慕之心錫范曰得尺守尺時不可失汀州若得便窺取邵武而圖全閩也經依二人議遣都事林貴齋書報精忠曰

字內既平今欲命將分水陸並進水者由瓜鎮陸者從江右大會吳藩取江南但汀州必經之道願借一往

四月初一日經令吳淑督萬人入汀州以觀其變淑過永定上杭二縣約束部伍草木無動徐徐而進十三日到汀州駐劄東教場聲言候齊出師客主相安周應時得鄭經密諭星夜馳應麟營詳陳始末時應麟方陷瑞金卽于二十八日回兵令黃助趙時可先到汀州報蔡達曰鄭師借道恐其有變

故將軍兼程回師共守城池達曰鄭師正是欲與將軍同出江右者將軍業得瑞金何得撤師而還必有別意隨督其部將分兵上城閉門嚴守不納五月十八日應麟提師報到知達據城將兵屯羅漢嶺謁吳淑請計淑曰將軍兵士眷口悉在城內彼孤軍決難遏制速攻之必有應也遲恐援師至矣遂約於二十夜勵兵齊倚雲梯屢攻不得上延至天微曙麟兵環城叫喊呼父喚兄聲震雲霄忽蔡達前營周雲達開門接麟入達聞城破與其右營趙文魁帶親隨百餘人遁去從黃竹嶺奔回福州淑入城與應麟出示安民飛捷報經經封應麟奉明伯前提督仍鎮守汀州孟熊臣仍爲兵備道擢上

杭知縣朱廷燦爲汀州知府其餘照舊供職蔡達奔至福州見精忠哭告應麟密通鄭藩鄭師非意出江南實假道圖汀州精忠大怒曰本藩之屈意備好者欲全力出攻浙右會師於江南豈期共誓之墨跡未乾遂卽寒盟背約收我叛將侵我疆土令宣納司曾福寧同吳三桂禮曹周文驥下漳州見經經曰汀州馬應麟原與敝員會師江西不意蔡達突生異念構釁于內若非本藩師旅今日已屬他人矣附會其說以答之六月曾福寧回覆經言精忠大悞快其部下在外諸將益憂內顧七月中都尉徐光武見鄭師日迫人心皇皇密遣人持書到衢州與馬九玉令其速請親王入關八月九玉遣

心腹納欵于和碩康親王王大喜許保題厚爵九玉得命

遂約十五夜退兵十六早探馬哨巡九玉營果空報親王王令寧海將軍喇哈達都統賴塔一等侯馬三奇總兵李榮隨征福建提督段應舉等尾後進兵以浙江總督李之芳爲援

按三奇字乾庵原福建提督馬得功子功死于海襲封

一等侯迨三藩倡亂奇出家資養兵從征屢有建功

十八日九玉率衆不從仙霞回繞道常山玉山由河口分水關入閩業先遣人叅徐光武書通知守興化後將軍馬成龍親王至清湖恐有賊兵未敢突進諭喇哈達以巡騎四探探果無備進兵石門次峽口又虞仙霞有守屯劄保安橋原漁

樑守備把仙霞總兵王命庫原楓嶺把總總兵金應虎二人
薙髮出迎喇哈達于關下之保安橋哈達用爲前導引師過
關興化守將馬成龍接九玉書知衆共謀請親王進關卽遣
人往漳州見鄭經獻興化府經接啓表封成龍爲殄鹵伯援
剿左提督令許耀馳師入興化共守又馳令到潮州調何祐
江勝林陞洪羽林應許貴鄭國選馮騰龍劉成良王如虎張
國傑王一新陳昌陳侃曾偉等陸續回漳州聽令九月精忠
正在憂鬱之際有王進王可就二人欲謀福省通于和碩康
親王者命校尉擒殺之廣東尙可喜死之信遣使到漳州鄭
經處報訃並請其妹奔喪妹係懷安侯沈瑞嬪母同瑞居厦

門經允其請遣回令禮官林桂入粵弔祭吳三桂在衡州聞
可喜死晉封尙之信爲輔德親王吳淑旣得汀州與應麟又
卜諸邑遂瀝情飛啓云

汀州居萬山之中實係贛州廣信要隘地方遼闊岐路多
雜恐一旅之師不足以守禦况邇來偵報仙霞失守親王
大隊進關祈迅發重兵前來協守觀望尙有別圖亦足以
進取

經令左武衛薛進思督果毅後鎮吳祿井宿鎮江仰聖女宿
鎮毛興奎宿鎮鄭國選角宿鎮吳桂斗宿鎮王一新牛宿鎮
曾偉木武鎮馬有魁信武鎮張國傑戎旗四鎮馬騰龍戎旗

五鎮高明等兵往汀州並諭吳淑加意防守相機而行進思到汀分各鎮把守隘口出寇温台左軍都督曾養性告請糧價精忠令布政司蕭震捐銀五千前去給散兵食震以貧對精忠大怒初七日令校尉擒震絞于南門甕城差吏曹鄭章全徐鴻弼抄其家搜括銀十餘萬精忠聞報仙霞失守親王入關延建將危即放平北將軍王進功回泉州治兵應援進功至泉往謁鄭經經表封進功爲匡明伯中提督

按進功于甲寅四月至省爲精忠所困欲併其家其子急而歸鄭至鄭耿交好進功之妻與子請於經經修書與精忠欲進功回時精忠業以其女妻進功次子精忠

欲功子入省方肯放功回泉經執欲功先回然後送其子入省完婚爭執不定而中止遂至三年

精忠又與諸將商議若有緩急當航船入海獨徐光武以爲不可豈有自爲王而欲依於王者乎殿下係 皇親倘能悔悟 皇上必不見罪不可生疑畏而受禍精忠意尙躊

躇光武按兵甚嚴星馳密啓與親王速進兵恐有變初十日奉精忠命看守原福建總督范承謨禁卒有徐應虎者以謨忠義可嘉百計勸慰待時後又受泰寧許鼎賄托愈朝夕慙懃服侍迨聞親王逾仙霞衆議不肯下海欲薙髮投誠密通承謨知爲侍見天日矣謨笑曰如是吾將不免應虎曰公何

出此言三年尙不相害豈至投誠又起殺心謨曰爾有所不知彼必不敢活我以存形跡遂覓炭燼畫絕命詞于壁曰

一笑襟開萬怒平

龍興有寺葬真卿

執旗厲鬼爭前導

盡掃穿牆穴壁艇

十一日親王遣官到省溫諭許爲保題仍授王爵鎮守福

建精忠方定議十八日接詔薙髮歸正但虞承謨乃從

龍望族生回闕下必大彰已過不如除之以滅口十六

夜二鼓差呂八帶人至幽室承謨尙偃臥未睡應虎報知謨笑起曰今日纔畢吾事卽披衣將行而呂八威喝聲厲謨怒目裂皆舉手中械索摔之爲左右勸開遂望北九叩首曰罪

臣奉職不能爲國家除此叛賊死已遲矣八愈憤喝從者縊死又往別室勒死謨幕客家人共五十三口

按承謨遼東蓋州人壬辰進士撫吳廉正有聲迨擢閩

督值于甲寅三月望日禁于幽室絕粒求死者再悉爲

守者防護勸慰及耿平事聞

聖祖有智不及展勇不及施之語褒之謚曰忠貞祀福州城

內烏石山之南

精忠于十八夜半薙髮待罪親王知忠歸正提師十月初四日到洪山橋初五日入城安民傳檄各郡縣其鎮守邵武將軍楊德那羽聞仙霞失守九玉退軍延平親王進闕耿藩已

剃髮即遣人到汀州通吳淑淑將汀州交薛進思劉應麟鎮守淑與弟潛暨諸鎮從寧化越望高嶺兼程趣邵武與楊德邢羽共守親王正在撫綏殘黎忽報興化馬成龍舉城歸海繼報鎮守邵武楊德邢羽亦延賊據城鄭經聞精忠薙髮與諸文武商議守禦吏官兼宣慰使洪磊曰耿藩勢逼薙髮投誠幸興化已歸順速當治兵固守烏龍江然當此任者非磊步將許耀不可經曰許耀恐非主帥之才宜令馬成龍督兵把守磊曰前者惠安之捷追奔數十里斬馘數千遂使王進之宿將破膽耿藩之強悍已和今福州兵士聞耀名率皆震恐馬成龍乃新附之將心腹未足深信豈可假以重權繩武

曰大凡出禦將帥當使鄰邦畏懼許耀名震福州令之督禦烏龍江甚得其人宜委任之經即馳諭興化以耀爲總督督諸鎮兵馬進屯烏龍江吏官都事陳駿音上啓有曰

耿尙連和漳泉安枕雖未效先王航船入瓜鎮而取江南亦當速命將鼓勇由興寧而直搗贛州大會周師以倡義舉何得聽吳淑煽惑引師借道信應麟私意反兵據城既敗兩國之好隨失同仇之義致耿藩勢窘我師忙蹙不知當事者作何主意不以爲怪而反詡詡榮幸臣恐禍不旋踵而至

經示錫范繩武范武以駿音老朽誕言

按駿音原隆武中書舍人石齋先生之弟子時年七十有四

十一月耿藩左都督曾養性接精忠檄隨剃髮撤師自溫台航海回閩其部將朱天貴不肯從養性投誠將舟師悉附守鎮定海奇兵鎮黃應與水師一鎮蕭琛等引眾邀擊養性歸師獲船數十號報捷經大喜授朱天貴爲樓船右鎮仍同黃應蕭琛等拒守定海分巡南日烏洋各島期會師進攻福州按天貴興化莆田人後投誠官浙江平陽總兵從施琅征澎湖死于戰

康親王接馬成龍獻興化歸海之報恐賊兵窺侵福州卽會

靖南親王耿精忠將軍喇哈達都統賴塔一等侯馬三奇都統曾養性江元勳馬九玉等暨提督段應舉列營數十里踞守烏龍江之東許耀接鄭經令諭督江勝林陞王如虎林應張漢相魏其志李尙久盧仁黃良驥許貴施定華尙蘭等十二鎮屯劄于烏龍江之西營壘相對陳駿音見贊輔荒悖不急時政復上啓有曰

何其左右無謀聽信煽惑歡一時之苟合構釁鄰邦棄萬載之良策失約周師遂致前門拒虎者灰心雍髮今旣如此悔莫可及速當命將統貔貅之衆倍道出邵武督舳艫之師疾迅攻南臺然後親統六師水陸並進臨江督戰庶

可冀成效若復優游歲月委擔他人恐其禍不遠

經將駿音啓示六官陳繩武曰凡爲人主者提調六軍密授機宜自然決勝千里之外駿音不識大體徒鼓狂言遂出駿音爲漳浦所之銅山安撫司將軍喇哈達見賊兵烏合與賴塔段應舉會議乘沿江炮臺未備伐木爲筏廣取船隻渡兵過河破敵倘遷延日久沿江布置督一旅水師從閩安而入我師聲勢必爲彼所分矣賴塔是之令沿江所有船隻悉取密藏港內併伐竹木爲筏等候渡江許耀泉之惠安人健漢雄聲有勇寡謀依從洪磊之勢偶同國軒之捷當事者以爲天下莫敵蓋世謀畧迨授任主帥至江邊據營扼守夜見東

岸連營火光數十里心懷疑畏適過江探者回報稱滿漢奇兵步卒十餘萬首程先鋒係皆耿藩諸將領馬上金鎗手其次賴塔段應舉馬三奇李榮等再次將軍喇哈達也另有別隊欲從南臺配船由閩安而過登岸合擊耀聞之心愈慌隨撥盧仁張漢相二鎮帶本部兵士前往要口鎮守防閩安一道渡載登岸者以王如虞領騎兵一千爲先鋒江勝督步旅三千爲副黃良驥許貴林陞林應四將帶兵八千爲左右救援其餘防守沿河營壘隨啓陳敵師十餘萬非十二鎮之力可禦速當益兵固守又請辭以材非總督不敢任此重擔恐誤封疆大事又一啓當此大敵非侍衛馮錫范督領諸軍亦

當遣左提督趙得勝糾率勁旅前來相機料敵方可日出啓
三因接踵告急經示繩武錫范曰誇張敵勢乃邊將故套方
以顯其功耀之辭不敢任總督者示其謙也此敵正欲觀耀
之雄畧遲遲不爲意經懦而無斷亦爲姑息耀見屢請援師
不至外雖誇張在彼前來不足吾一擊內實乏策指揮空費
踟躕耳十七夜三更耿藩隨征副將陳英帶兵三百餘人
竊船渡江相投江勝與如虎接之隨報耀耀令其衆暫過山
後屯劄俟明晨見之如虎曰本督當此兩軍相對敵情未曉
幸有歸誠急當見而詢之庶便畫策豈可以俟明日乎耀方
召陳英入見面詢英曰領先鋒者耿藩之將金鎗手也其賴

喇爲二三程不日卽欲渡江又有一隊從閩安而來所陳與
偵者無異耀懷益亂十八日會議沿江設備陳英請曰最重
者蕭嶺脚炮臺彼船欲候流退風順而齊過此炮城上下可
防五里英蒙收錄無微勞報効願領守此城立功耀以初附
之將未敢信任隨擱之未定二十日四更潮退風順馬九玉
等領諸軍船筏如葉蔽江而下耀得報一面令諸鎮至江邊
禦敵一面飛調堵閩安路二鎮回師助戰九玉等登岸與王
如虎江勝等死戰雖未分勝負江元勳率金鎗手從蕭嶺後
炮臺邊登岸橫擊銃如雨點江勝王如虎不能支陣遂亂耀
見如虎等陣亂急督兵援之亦敗退守蕭嶺日將卓午忽報

下面騎兵飛奔雲至是從閩安來者耀急令林陞盧仁等領兵往敵甫離營而九玉江元勳等騰湧前來矢銳交至難當遂大潰曾養性守烏龍江之東清涼山上望騎兵已登岸斲殺喜曰背水陣成矣賊可破也江元勳等追至宏路方收軍是役也艸木皆兵殺賊六千餘級獲輜重軍器不可勝計許耀等抱頭而竄至三更抵漁溪不敢安營掠食而遁天明至涵江神稍定方敢駐足鄭經知耀大敗卽令趙得勝爲帥領何祐陳昌陳侃陳大烈等星馳守興化禦敵又馳諭潮州調進忠帶兵救援進忠不聽命有自踞意康親王以邵武乃上游要地今爲賊所踞若不遣將平復恐從延建出煽惑奸民

貽害地方令都統穆黑林胡兔全中路總兵劉又昭帶騎步兵一萬進攻邵武鄭經得邵武捷加楊德爲平鹵將軍後勁鎮邢羽爲折衝中鎮竝諭吳淑善覲方便進取延建合取福州淑正在撫綏地方分守隘口忽報穆黑林領滿漢師進剿十一月二十五日淑率諸鎮剖長橋以作犄角之勢奈雪滿山頭嚴凍難堪十二月初三夜偵報穆黑林大隊卽至淑恐其驟來冲突令兵士據橋守險以待其弟潛請曰水到土壓兵來將禦尙欲進征今反坐待當抵新亭迎敵淑曰非爾所知也新亭曠野便于馳驅長橋一帶有水可恃據險以待我逸彼勞徐觀其變用計破之潛不聽必欲過新亭時陰風蕭

颯大霧迷漫潛衆渡河河水沒脛軍士登岸肌膚凜冽胡兔
領滿騎突至冲殺箭如飛蝗潛奮勇揮軍死戰邵武鄉導閻
進功己先歎通於黑林正酣戰間率其部伍反攻潛軍自亂
死傷大半急欲退守長橋天明淑知潛進兵虞其有失遂統
軍前去接應甫至中途突遇潛敗未及述而滿騎追至淑兵
遂無門志咸退楊德聞報亦卽統衆出援悉爲敗兵冲散不
敢進守邵武退據建寧縣黑林入城安民其薛進思在汀科
斂虐民接報許耀烏龍江大敗滿漢兵十餘萬追逐甚緊己
調趙得勝何祐馳守興化驚疑靡定至初七日申刻塘兵又
飛報吳潛兵潰新亭再報淑與楊德等己棄邵武追師卽至

進思惶忙急收輜重馳傳各守隘諸將士抽回漳州劉應麟
聞知思欲去率騎見進思曰本督何忙甚而欲旋師思曰烏
龍江大敗是長江失恃興化必難守今邵武又失當速退兵
共守漳泉若遲滿漢雲至行不及矣麟笑曰本督奉令守城
敵人離此尙有四日之遙况吳本督踞在建寧縣乃萬山之
中速會師進援固守險要以觀其變邵武尙可恢復何本督
自爲主帥而驚潰若此豈不令三軍瓦解弟願出家資養兵
守城倘萬一緊急卽飛請救援安可未遇敵人而自棄遁乎
進思曰公不識時務此城不可守兵心已潰公勿多言應麟
見進思言語舉動全無大丈夫之氣節頓足曰豎子誤人吾

死無葬地矣不可與伍進思大隊乘黃昏出踉蹌猶如喪家
狗奔回漳州應麟亦令人備船隻將眷口家資載下潮州依
劉進忠搥胸嗟嘆飲恨氣塞數日而死十二日黑林提師至
建寧縣淑曰城孤不可守明日與之決戰倘不能勝然後退
保汀州德是之淑五更率衆出雲蔽雨霖雪滿山頭黑林領
騎兵已時方至淑守候已久衆兵餓而兼凍不敢接戰遂退
三十里安營炊食淑撫慰諸軍曰爾等若再辛苦一夜便到
汀州則有城可守大會諸師然後設計破之衆軍欣然食而
卽行天明至汀州淑望城曰旌旗無色金鼓寂然駭曰守者
何在隨問鄉人方知進思聞戰敗之信卽去業已五日矣淑

與德等計絀亦領衆軍兼程回漳

臺灣外記卷之二十

敗七府國太執法

入潮州進忠歸正

康熙十六年丁巳

附稱永曆三十一季

正月趙得勝與何祐奉令守興

化會馬應龍許耀議拒敵之策得勝仍令應龍守城自與何祐悉出據險列營作聲援耀請曰邇偵有小路可達方口耀願帶原統鎮將抄出其後本部鎮兵進攻使彼首尾不顧破之必矣得勝許之耀率其衆行但山路崎嶇適又淋雨日行不過十餘里喇哈達接親王諭其乘勢追趕勿使喘息隨督賴塔段應舉馬三奇曾養性江元勳馬九玉徐光武等騎步兵至興化趙得勝急謂何祐曰滿漢雲至城危旦夕右虎前

往之兵已虛其行速當調回合師與戰祐曰公見最高須急
召之耀接得勝令遂反師時各寨戒嚴守禦因而軍士乏食
悉有饑色喇哈達見賊分營據守恐有別謀令段應舉江元
勲等列陣逼戰何祐欲出兵迎敵勝戒之曰初到勢銳暫守
以避其鋒候右虎回師方合兵與戰祐恃勇不聽鼓衆而出
爲曾養性所敗勝見祐潰急督諸將援之九玉元勲望勝出
師引兵合擊勝亦敗退據其營祐因勝救養性衆稍虛乘勢
併出奔入興化城勝營被圍三匝督衆死拒見無援師謂諸
將曰吾奉周王之命傾心歸藩指望分茅裂土誰知中途同
此牧豎輩全事征伐勸而不聽奔而不援噫天耶命耶大丈夫

夫寧可死於沙場豈可搖尾乞憐爲天下英雄羞隨大開營
門督所部憤不惜身首先冲陣左馳右逐不得出圍忽坐馬
中排鎗得勝棄馬步戰連砍數人人莫敢撓何祐登城遙望
擁衆不救得勝孤軍無援被段應舉曾養性元勲三奇等環
繞攻擊勝左右死傷已盡雖賈勇步戰身中十餘箭力竭遭
砍全軍覆沒祐四門緊閉逃回軍卒亦不放入是夜二更祐
開南門遁泉州二十九日鄭經在漳接興化趙得勝陣亡何
祐棄城敵師將至惠安報與馮錫范陳繩武相顧失色二月
朔弛城禁悉放婦女出百姓鼎沸絜男女載道號呼哭避山
谷時何祐林陞林應蔡文鄭國選沈誠陳昌諸鎮渙散無術

約束聽其所之不敢駐泉或捏舊人數夥從安海貫口沙溪而渡廈門者或招諸黨散衆入長泰烏山天保而爲寇掠者初九日喇哈達大隊至洛陽橋參宿鎮謝貴統其所部出新鋪接戰被殺餘黨四潰追騎搶城而進城守林定走不及匿于人家哈達安民分禦隘要初十日未刻經接泉州敗績失城報忙與馮錫范陳繩武登舟順流出廈門哈達既定泉州謂賴塔曰師不可停宜乘破竹之勢下漳州塔曰公論甚高隨率馬三奇段應舉曾養性江元勳等騎兵二十日抵江東橋探無阻卽統大隊直進甫至關父老綵旗羊酒以迎喇哈入城達安民三月初二日分師到海澄令馬三奇守賴塔督

兵南下浦詔二縣人民薙髮恭迎至章朗分水關有連營把守者乃潮州劉進忠別將也塔屯詔安雲霄候令進取鄭經繩武錫范等到廈門諸文武乘其懷疑未及周防各星散如潮患道江德中碣石總兵苗之秀漳浦總兵劉炎漳浦營城守張國傑竊船投誠獨有建威中營吳桂全師歸廈門軍威甚壯繩武錫范勸經歸東寧經將欲行廈門百姓沿岸哭留聲如海濤經亦惻然乃暫住廈遲數日諸鎮陸續逃歸如泉州城守林定削髮爲僧亦至又各整隊伍人心稍定繩武以吳桂原係漳州守備今兵威太重恐其有變密啓經經擢桂爲五軍都督解其權以其子領兵吳天祿爲箕宿鎮又調北

臺海外言 卷二十一
汎水軍黃應朱天貴蕭琛蕭武等回船防衛經與錫范繩武將輜重玩好絡繹載過臺灣畱守東寧總制使陳永華改七府始末上陳董國太大怒曰豎子無能傾覆桑梓辱及先王下令切責竝究喪軍之魁者許耀擅棄城池者薛進思斬首示衆又追祭趙得勝暨陣亡諸將經拜奉母命欲正許耀等法進思俛首無言耀大呼曰此藩主負耀非耀負藩主耀承委總督恐誤軍機不得不星夜馳赴迨至烏龍江觀敵勢浩大力不稱職前後共七十二啓請兵調將辭職解權藩主默然不應致耀獨力敗績今欲斬耀耀罪安辭請出七十二啓示衆耀死亦瞑目經無以難之洪磊出啓曰千軍易得一將

難求耀誠勇將磊願出家資製甲造器養兵二萬與耀恢復漳泉經遂允磊保立功贖罪出進思斬首號令諸將親詣江邊遙祭趙得勝暨陣亡將士遣禮部都士林桂往臺灣復國太命耀得不死磊卽交銀二萬二千兩招兵製器用耀心急氣憤忽染痢疾不數日死經聞之亦爲惋惜經以百姓攀出且承國太下責與陳繩武馮錫范不敢言歸四月諸鎮聚集一島軍資不給繩武啓經分諸鎮沿海駐劄就地取糧經允其請分前虎衛林陞駐東石雷南地方水師一鎮蕭武往湄州守興化地方水師四鎮陳陞水師五鎮蔡冲瑀七鎮石玉八鎮陳勝分撥蚶江祥芝崇武獺窟以隸晉南惠三縣沿海

地方水師二鎮江元勳三鎮林瑞驥守海澄芝陰凡福清長
樂濱海聽其管轄總制親隨協王一鳴守鎮橫嶼樓船中鎮
蕭琛守定海地方危宿鎮陳起萬守福寧州地方總制後協
林日慧前協吳兆綱分割福安寧德地方樓船左鎮朱天貴
右鎮劉天福督師往浙江寧波溫台舟山等處援剿後鎮陳
起明守同安港汭洲地方後提督吳淑駐劄廈門大石湖兼
轄同安揚威前鎮陳昌左鎮陳福分割謝村澄海地方戎旗
一鎮林應守井尾連江漳浦地方左衝鎮馬興隆昭義鎮楊
德奇兵鎮黃應英兵鎮李隆楊奕房宿鎮楊興分屯銅山五
都詔安南澳潮州淺山等處宣毅左鎮邱輝仍劄達濠以遏

潮揭惠來地方布置周密以作聲援康親王以漳泉既平鄭
經尙在廈門船隻一時未得應付况惠潮尙是劉進忠所據
追僉事道朱麟莊慶祚往廈門招撫其書曰

嘗聞順天者存逆天者亡又曰識時務者在乎豪傑我

國家定鼎風聲所被四海賓服此固氣數之有在而億兆所
歸心也適因吳耿煽亂貴將軍乘間竊據獨不思尺土豈
能與天下抗衡而執迷絕島非識天時之君子特遣弁員
用布腹心轉禍爲福請順

本朝共享茅土之封永奠山河之固傳之子孫豈不世世食
報無疆哉

經禮朱莊二使答以先王在日屢承招撫只差剃髮二字若
照高麗朝鮮例則可從議送朱莊二使回棧復書曰

夫萬古正綱常之論而春秋嚴華夏之辯此固忠臣義士
所朝夕凜遵不敢刻忘也我家世受國恩每思克復舊業
以報高深故枕戈待旦以至今日幸遇諸藩舉義誠欲向
中原而共逐鹿倘天意厭亂人心思漢則此一旅亦可挽
回何必裂冠毀冕然後爲識時務之俊傑哉

親王以其言語狂謬議竟不成遂飭府縣取辦船料修整戰
船以便進剿時有漳州人蔡寅以左道惑人乘鄭經漳泉之
敗收其餘黨詐稱朱三太子交泉州人許挺爲內應於三月

十九夜半寅領八十二夥頭各書符一道潛至泉州城下魚
貫緣堞而上鳴鼓揚旗直至開元寺前將軍楊鳳翔聞報發
令曰此必有奸人作亂各守堆之兵勿動俄而提督中營參
將馬勝擒挺殺之寅見無應隨轉身砍西門逸去無一失者
曰是人益信其術神盧世英紀朝佐鄭不越吳金龍歐九王
鼎等羣然尊奉衆至數萬駐南靖長泰同安等縣山谷聲勢
益盛其衆皆裹白頭衆咸目爲白頭賊官軍累爲所敗故此
親王調滿漢兵集于貫口而未暇半海

按蔡寅住龍溪縣之馬口鄉農業種園與漳浦僧道一
最善往來言歡有年道一庵中蓄一白狗老而斃因葬

寺左之埔久而成怪遇晚變爲秀士衣白遊戲兩旁左
右鄉人悉見詢道一庵有何客道一日無衆口一詞道
一疑是狗變幻意欲遷毀狗隨托夢蔡寅求其庇護後
當重報寅覺詫異是日道一欲往漳順途顧寅寅延入
室加意繾綣隨叩其故道一曰實有是事寅求之曰業
已相托求大師勿遷道一許之別去是夜又夢狗來謝
遂附焉有事先報知寅遂生計供奉哪叱太子靈驗無
比祈禱者接踵適永漳鄭經遁厦寅往同安路次招集
餘黨詐稱曰我乃三太子倡亂惑人道一知寅勢盛親
往十八保山見寅索謝寅以兵餉尙無措處安有餘囊

堪以遺贈俟日後作報耳道一辭歸寅亦不留道一憤
回庵將狗掘開其體如生以火焚之燃其骨灰從此寅
無所聞術亦不靈被總督姚啓聖所敗奔歸鄭經經授
寅湯鹵將軍改名蔡明文

潮州總兵劉進忠曾于乙卯年八月單騎至海澄面鄭經見
經語言人品平常心遂輕之迨烏龍江許耀敗歸經馳諭調
進忠入援忠不聽續聞興泉漳三郡已歸正即遣將列營據
分水關以自守修書與國軒約束粵東一旅吾弟當之閩省
之師愚兄自任國軒應允進忠遣潮州城守陳文嵌入閩謁
康親王及耿藩窺探虛實親王將軍至督撫賞賚加厚獨耿

潘錫進忠袍褂各一靴一珍珠一顆剖爲兩片用絲裹之交
文嵌嵌適往隨征署福建布政使司姚啓聖素與文嵌交最
善文嵌勸啓聖入潮招撫啓聖恐忠心未決難以口舌動之
文嵌教以得伊小主馬三奇書則事濟矣啓聖隨啓親王王
允之以隨征通判王綸部爲副順取一等侯馬三奇書同陳
文嵌回潮嵌告啓聖耿藩所賜物件始末聖教文嵌匿其珠
片做帽一頂加之

按啓聖初除廣東香山縣因盧總督楊平南王通海接
濟悉由香山縣澳出章連啓聖本出三日送橐與王王
遂參總督虐民數十款星馳兼程進京本上在總督前

二日總督聞報懼王勢力投環時陳文嵌在總督處爲
旗鼓二比俱發掣問啓聖文嵌均繫獄故善交焉

五月劉進忠正在操演士卒追積糧餉觀望忽陳文嵌從閩
回備述親王之意出馬三奇書曰

憶昔溫陵聚首親愛彌深緣構先嚴之變鴻鴈南北揆違
已十餘載矣每一引領不禁重爲悲悵也老兄臺智勇絕
倫威名遠著浙越潮惠原爲廊廟之股肱因閩疆兵變以
來勢孤莫挽遂使封疆重臣俱被屈陷然初心豈敢爲從
逆而弗顧耶良以一木難支惟有隱忍以圖後日之舉耳
今和碩親王奉

詔撫閩凡一應去逆歸順之人不特盡釋前非更置高爵厚
祿必誠必信以待歸誠耿藩係首事者也一經悔過即復
王爵恩禮更加疇昔下至脅從亦皆照舊供職毫無猜忌
况原爲王臣因逼於勢力不加而聞風惑亂者乎其赦過
復用斷斷無疑者也弟以手足摯情已將兄臺訴之親王
前而親王亦無不諒兄臺之心而慕兄臺之望者倘得翻
然倡順均有同心必有從風而起者是王師不折一矢
而成膚功皆兄臺一人之倡成王自當特疏題
請破格優錄不過一反手之勞而
朝廷之爵祿隨之矣邵武先復汀漳泉業已蕩平師旅所加

無不披靡卽不言干戈相向也區區濱海邊隅豈兄臺展
足之地乎以兄臺之明成敗吉凶洞於觀火奚待弟之喋
喋但休戚相關之誼不忍漠視故不禁言於兄臺之前弟
今蒙親王之命執統前矛則弟非同虛謀之辭罔聳聽聞
當念今日簡命之重竝思先嚴優渥之誼潛布腹心改
正歸成爲上游之首事是功旣優於特等爲
九重眷注之隆必有過於尋常萬萬者語云識時務者爲俊
傑正今日千載一時也願兄臺熟察而果行之弟不勝南
向翹瞻之至

進忠觀畢喜曰吾當遵勸爲此方百姓造福死生聽

臺灣外記 卷二十一
朝廷之命文嵌密遣人來漳報啓聖卽行六月初五日姚啓
聖王綸部至潮州勸降進忠安二鎮于韓文公之祠是日諸
鎮將士羣然偶語左鎮何鳴鳳入見進忠曰兵心未安衆口
哢哢二使在此恐有不測進忠曰非子言幾乎誤事卽移啓
聖綸部于潮州府署內令知府王仕雲款陪

按綸部仕雲子以招惠潮功補授惠州府興寧知縣
何鳴鳳率親信饒將守護初六早劉進忠薙髮歸正拜授征
逆將軍征逆伯遣中鎮陳璉帶兵星馳往惠州劉國軒聞興
泉漳汀邵連失嘆曰豈有前門人爲之拒虎可以高枕無虞
反輕聽左右而爲狼假道竊恐失信天下逼人於無可奈何

一旦共爲瓦解迨接進忠書約共守禦惠潮遂飭東莞石叢
新安各將加意提防十二日陳璉至惠令軍民薙髮國軒謂
璉曰原與貴爵主共約守土若於投誠亦當通知同作計較
豈有陽爲指畫而陰謀獻地陷人於不義哉今將全城交與
貴鎮吾單騎東歸矣璉曰本爵亦有成言若統領允共歸順
則敝爵主當啓王飛章 題報係出自裁苟若不允欲回臺
灣亦任統領之意國軒曰多承貴爵主厚道倘異日相逢當
避三舍以報德隨卽修啓馳辭輔德親王尙之信於同城諸
文武將所有輜重衣用馬匹軍器等物悉送陳璉僅帶親信
二十餘人單騎出城兵民聞國軒欲去俱送之軒下馬共相

揮淚依依不忍沿途百姓咸餽其食從靖海所下船尙之信
接軒告辭啓亦差員駕船趕至表裏送之二十四日國軒舟
到銅山遇何祐從廈來亦到各相候問而敘近事祐入雲霄
港由下河庵後陷平和縣徵派糧餉收拾舊黨二十七日國
軒至廈門面經經大喜曰虞公之難脫虎口也軒曰恃藩主
威庇軒處虎口如泰山忽報吳淑破天成空其寨而回又欲
統師前往德化軒啓經召淑回共商進取何必滋擾生靈經
允軒請馳諭調淑回親王欲催造船隻克平諸島奈白頭賊
蔡寅詐稱朱三太子煽亂于同定之十八保長泰南靖等處
甚是猖獗官軍屢爲所怯故以鄭經之狂悖而寢其議迨查

己酉年七月間慕天顏曾使臺灣招撫欲照朝鮮事例稱臣
納貢親王循例遣泉州知府張仲舉興化知府卞永譽各加
卿銜會泉州鄉紳黃志美監生吳公鴻再申前議令其讓回
各島許爲題請以息兵安民爲詞入廈見經經與馮錫范陳
繩武劉國軒吳淑等會議錫范執以欲安民必先息兵息兵
必先裕餉果能照先藩之四府裕餉則各守島嶼而民自安
矣張卞不敢主辭回復命親王以其無定局又無報使等海
將軍喇哈達曰徒以言語僕僕往返未盡曲折以啓其衷會
內院覺霍拓修書再差吳公鴻往廈見經其書曰

愚聞興滅繼絕者聖世之深仁保國全名者賢豪之至計

朝廷定鼎三十餘年南徼北塞盡混車書獨海濱一帶之區
未得波恬浪息致使士卒被戰爭人民轉溝壑化離愁苦
之狀慘目傷心伊誰之咎年來使車往返議撫議貢幾於
舌敝唇焦矣而至今迄無定論者總由貴君臣挾一盡節
爲明之見而逆計數年來之汲汲議撫我

朝廷自圖便利耳噫竊嘆貴君臣之計左也夫議撫者爲全
爾貴君臣名節計也非爲墜爾君臣名節計也爲我

國家培萬年根本計也非爲我

國家圖一時便利計也願執事大破拘孿俾得竭殫愚衷聽
貴君臣之自擇可乎夫明季遭闖賊荼毒之後社稷圯墟

生民塗炭我

世祖章皇帝大興援師弔民伐罪不數月而國賊授首流寇
銷亡然則覆明祚者誰乎滅闖賊而殄明仇者誰乎此天
下之所知非獨執事知之也迨夫有明之天命旣去四海
人心歸于 本朝然

世祖章皇帝蓋嘗親祭明懷宗之墓

御撰哀詠灑泪酬觴今我

皇上又復大舉博學宏詞之士纂修明史命執筆之士搜剔

褒揚勿避

興朝忌諱此可謂巍巍

聖德度越古今雖征誅而同揖讓者矣而貴君臣僻處一隅

負固馮陵欲圖未盡之天數命將出征實

朝廷應天順人萬不得已之計也天下已定東西南北悉入
版圖而貴君臣獨自竄窮荒守明正三朔十餘年不忘舊
君此與吳三桂自稱大周皇帝爲兩朝之亂臣賊子異矣
我

朝自以忠勸天下何忍驅爾君臣豪傑之士盡出于忘君負
國之所爲所以從來之議撫者必曰削髮耳登岸耳背舊
主而臣服于朝耳不惟墜爾君臣三十餘年尙義之名
且損

朝廷千百世勸忠之典豈

熙朝盛世所喜談而願見者哉乃今不忍不披陳利害于執
事之前者憐爾君臣之苦節而樂爲爾君臣計安全也大
凡丈夫之建大功而謀大事也必審時而揆勢時勢之所
可爲而縱橫四海建非常之業而不爲難時勢所不可爲
則當承順天心爲保國全名之計今執事試思兩島之區
孰與夫四海之大也烏合之衆孰與夫鐵騎之雄也濱海
漁鹽之所出入孰與夫九州田賦之所貢稅也謀生求食
于風濤之間孰與夫深溝高壘以逸待勞以飽待饑之利
也以勢不均以力不敵而欲以區區蕞爾之土與天下結
怨連兵不已惑乎昔甲寅之變天下騷動當此之時貴君

臺灣外記 卷二
臣有兵十萬聯郡跨州好亂之民翕然歸之然大兵南下
旬日瓦解將無固心士無戰志何則天命有所歸而且
皇上布昭聖武闢越秦楚之地復歸輿圖吳逆以十數萬之
衆盡覆湖南滇黔之餘魄望風遂歎執事既不能乘風破
浪相與拒衡于三吳大江之上而徒沿海剽掠出沒無常
流殃爾桑梓播虐爾鄉鄰寡人之妻孤人之子賊人室家
戕人墳墓荒人田疇不惟棄我

皇上好生之德卽爾明三百年流風餘惠亦剝削消磨殆盡
貴君臣區區忠義恐不足以蔽其暴亂之辜矣爾君臣同
心共事中間智謀之士豈無計及此哉然隱忍觀望所以

遷延未果耳噫此又惑矣昔箕子殷之忠臣也殷祚旣滅
不得已就封朝鮮以存殷祀田橫齊之義士也恥於臣漢
與百人刎於洛陽客死島上夫田橫雖義非箕子比也願
貴君臣同于箕子勿徒蹈田橫故轍則何不罷兵休士全
車甲歸保臺灣自處以海外賓臣之列某受封爵惟願其
不受封爵亦惟願我

朝廷亦何惜以窮海遠適之區爲爾君臣完全名節之地執
事如果有意於此傾心相告愚雖武人添爲勲戚當爲特
請於

朝命所在有司以歲時護貴君臣之先世墳塋恤其族姓宗

支不許兵民侵謀欺暴行三代之曠典成千秋之美談者
此亦我

皇上之所不靳也執事如知感

朝廷之恩則以歲時通奉貢獻如高麗朝鮮故事通商貿易
永無嫌猜豈不美哉夫保國存祀至忠也護祖完宗至孝
也全身遠害至智也息兵恤民至仁也行一物而四善備
爾君臣亦何苦而不爲此如徒悍然不顧希旦夕之安忘
先機之哲一遇議撫則大言誇詞要地請餉動云海澄必
不可捐兩島必不可棄姑待事窮勢蹙然後回臺未晚也
此皆小人懼執事之謀甚不足信夫事窮勢蹙之時人心

一散事變難防舟中之人皆敵國也執事雖欲全師而歸
恐不可得且事窮勢蹙然後歸亦何面目見江東父老乎
竊聞執事之臣每及議撫之時推委者多擔當者少夫小
人當危急呼吸之頃反面圖功名如翻覆手宜乎不以執
事之憂爲憂也執事宜內斷於心與一二親信有識者計
議築室道旁三年不成大懼身名之俱喪以爲執事辱也
余蠢直人也開口見心奉

命專征義不避難然感執事區區之義又欲爲海濱島上數
十萬元元生全之計告于神明然後拜書覬悟尊心以回
殺運言盡語極愚誠竭矣如終不可復合則請斷嗣音虛

意周旋之事無復望焉惟執事裁之

鄭經得書大會文武與吳公鴻商議鴻曰親王將軍之意屢著公鴻前來者正所以重藩主之忠義也苟擁兵東歸世守邊土永爲外翰保障不但沿海居民得沾其惠則天下後世無不稱羨爲明哲見幾錫范曰先王在日惟有兩島尙欲督舟師進攻江南况今加之臺灣進戰退守乎權可自操豈以一敗爲嫌若苟以生民爲念邊所海島悉爲我有資給糧餉則罷兵息民公鴻見其偏執狂謬卽辭回復命哈達亦以其迷而不悟狂悖無定見眞烏合之輩無足計議十月海澄公黃梧子芳世見全閩已平而惠潮越亦歸正以全家慘遭鄭

經誅戮仇不戴天上陳

朝廷憐之遂以芳世襲海澄公爵兼管福建水師提督事平海芳世於

陛見之日薦黃藍諳熟水務特

旨授藍爲左路總兵駐劄海澄縣

按黃藍曾帶密本從間道入京故世芳有是請以報其功吳淑以得天成寨之糧餉載歸廈門與國軒相機進取軒又啓請調何祐於平和十二月國軒收拾快哨八槳備用又親往南北汛安設各沿海鎮將



